

# **Hazrat Mūsā**

**Misr Meñ**



*hazrat mūsā misr meñ*

Hazrat Musa in Egypt

(Urdu—Roman script)

© 2022 Chashma Media.

*published and printed by*

Good Word Communication Services Pvt. Ltd.

New Delhi, INDIA

Bible text is from UGV.

illus.: J. Kemp, R. Gunther ([www.lambsongs.co.nz](http://www.lambsongs.co.nz)), S.

Bentley ([www.freebibleimages.org](http://www.freebibleimages.org))

*for enquiries or to request more copies:*

[askandanswer786@gmail.com](mailto:askandanswer786@gmail.com)

Tauret meñ likhā hai,

### **Yāqūb kā Kḥāndān Misr Meñ**

Misr meñ rahte hue bahut din guzar gae. Itne meñ Yūsuf, us ke tamām bhāī aur us nasl ke tamām log mar gae. Isrāīlī phale-phūle aur tādād meñ bahut barḥ gae. Natije meñ wuh nihāyat hī tāqatwar ho gae. Pūrā mulk un se bhar gayā.



### **Isrāīliyoñ ko Dabāyā Jātā Hai**

Hote hote ek nayā bādshāh taḥtnashīn huā jo Yūsuf se nāwāqif thā. Us ne apne logoñ se kahā, “Isrāīliyoñ ko dekho. Wuh tādād aur tāqat meñ ham se barḥ gae haiñ. Āo, ham hikmat se kām leñ, warnā wuh mazīd barḥ jāenge. Aisā na ho ki

wuh kisī jang ke mauqe par dushman kā sāth dekar ham se laṛeñ aur mulk ko chhoṛ jāeñ.”



Chunāñche Misriyoñ ne Isrāīliyoñ par nigrān muqarrar kie tāki begār meñ un se kām karwākar unheñ dabāte raheñ. Us waqt unhoñ ne Pitom aur Rāmsīs ke shahr tāmīr kie. In shahroñ meñ Firaun bādshāh ke baṛe baṛe godām the. Lekin jitnā Isrāīliyoñ ko dabāyā gayā utnā hī wuh tādād meñ baṛhte aur phailte gae. Āḳhirkār Misrī un se dahshat khāne lage, aur wuh baṛī berahmī se un se kām karwāte rahe. Isrāīliyoñ kā guzārā nihāyat mushkil ho gayā. Unheñ gārā taiyār karke inṛeñ banānā aur khetoñ meñ muḳhtalif qism ke kām karnā paṛe. Is meñ Misrī un se baṛī berahmī se pesh āte rahe.



### **Dāiyān Allāh kī Rāh par Chaltī Haiñ**

Isrāīliyon kī do dāiyān thīn jin ke nām Sifrā aur Fuā the. Misr ke bādshāh ne un se kahā, “Jab Ibrānī aurateñ tumheñ madad ke lie bulāeñ to khabrdār raho. Agar laṛkā paidā ho to use jān se mār do, agar laṛkī ho to use jītā chhoṛ do.” Lekin dāiyān Allāh kā khauf māntī thīn. Unhoñ ne Misr ke bādshāh kā hukm na mānā balki laṛkoñ ko bhī jīne diyā. Ākhirkā bādshāh ne apne tamām hamwatanon se bāt kī, “Jab bhī Ibrāniyon ke laṛke paidā hoñ to unheñ Dariyā-e-Nīl meñ pheñk denā. Sirf laṛkiyon ko zindā rahne do.”

## Mūsā kī Paidāish aur Bachāw

Un dinon mein Lāwī ke ek ādmī ne apne hī qabīle kī ek aurat se shādī kī. Aurat hāmīlā huī aur bachchā paidā huā. Mān ne dekhā ki laṛkā ḳhūbsūrat hai, is lie us ne use tīn māh tak chhipāe rakhā. Jab wuh use aur zyādā na chhipā sakī to us ne ābī narsal se ṭokrī banākar us par tārkol chaṛhāyā. Phir us ne bachche ko ṭokrī mein rakhkar ṭokrī ko Dariyā-e-Nīl ke kināre par uge hue sarkandon mein rakh diyā. Bachche kī bahn kuchh fāsle par khaṛī dekhtī rahī ki us kā kyā banegā.



Us waqt Firaun kī beṭī nahāne ke lie dariyā par āī. Us kī naukarāniyān dariyā ke kināre ṭahalne lagīn. Tab us ne sarkandon mein ṭokrī dekhī aur apnī laundī ko use lāne bhejā. Use kholā to chhoṭā laṛkā dikhāī diyā jo ro rahā thā. Firaun kī beṭī ko us par tars āyā. Us ne kahā, “Yih koī Ibrānī bachchā hai.”

Ab bachche kī bahn Firaun kī beṭī ke pās gāī aur pūchhā, “Kyā main bachche ko dūdh pilāne ke lie koī Ibrānī aurat ḍhūnḍ lāūn?”



Firaun kī beṭī ne kahā, “Hān, jāo.”

Laṛkī chalī gaī aur bachche kī sagī mān ko lekar wāpas āī. Firaun kī beṭī ne mān se kahā, “Bachche ko le jāo aur use mere lie dūdh pilāyā karo. Maiñ tumheñ is kā muāwazā dūngī.” Chunānche bachche kī mān ne use dūdh pilāne ke lie le liyā.

Jab bachchā baṛā huā to us kī mān use Firaun kī beṭī ke pās le gaī, aur wuh us kā beṭā ban gayā. Firaun kī beṭī ne us kā nām Mūsā yānī ‘Nikālā Gayā’ rakhkar kahā, “Maiñ use pānī se nikāl lāī hūn.”

### **Jaltī Huī Jhāṛī**

Mūsā bheṛ-bakriyon kī nigahbānī kartā thā. Ek dīn Mūsā rewaṛ ko registān kī parlī jānīb le gayā aur chalte chalte Allāh ke pahāṛ Horib yānī Sinā



tak pahuñch gayā. Wahān Rab kā farishtā āg ke shole meñ us par zāhir huā. Yih sholā ek jhārī meñ bharak rahā thā. Mūsā ne dekhā ki jhārī jal rahī hai lekin bhasm nahīn ho rahī. Mūsā ne sochā, “Yih to ajīb bāt hai. Kyā wajah hai ki jaltī huī jhārī bhasm nahīn ho rahī? Maiñ zarā wahān jākar yih hairatangez mañzar dekhūn.”

Jab Rab ne dekhā ki Mūsā jhārī ko dekhne ā rahā hai to us ne use jhārī meñ se pukārā, “Mūsā, Mūsā!”

Mūsā ne kahā, “Jī, maiñ hāzir hūn.”

Rab ne kahā, “Is se zyādā qarīb na ānā. Apnī jūtiyān utār, kyonki tū muqaddas zamīn par kharā hai. Maiñ tere bāp kā Ḳhudā, Ibrāhīm kā Ḳhudā, Is’hāq kā Ḳhudā aur Yāqūb kā Ḳhudā hūn.”





Yih sunkar Mūsā ne apnā muñh ḍhāñk liyā, kyonki wuh Allāh ko dekhne se ḍarā.

Rab ne kahā, “Main ne Misr meñ apnī qaum kī burī hālat dekhī aur ḡhulāmī meñ un kī chīḱheñ sunī haiñ, aur main un ke dukhoñ ko ḱhūb jāntā hūñ. Isrāīliyoñ kī chīḱheñ mujh tak pahuñchī haiñ. Main ne dekhā hai ki Misrī un par kis tarah kā zulm ḍhā rahe haiñ. Chunāñche ab jā. Main tujhe Firaun ke pās bhejtā hūñ, kyonki tujhe merī qaum Isrāīl ko Misr se nikālkar lānā hai.”

Lekin Mūsā ne Allāh se kahā, “Main kaun hūñ ki Firaun ke pās jākar Isrāīliyoñ ko Misr se nikāl lāūñ?”

Allāh ne kahā, “Main to tere sāth hūngā. Aur is kā sabūt ki main tujhe bhej rahā hūñ yih hogā ki

logoñ ke Misr se nikalne ke bād tum yahāñ ākar is pahār par merī ibādat karoge.”

Mūsā ne etarāz kiyā, “Lekin Isrāīlī na merī bāt kā yaqīn kareñge, na merī suneñge. Wuh to kaheñge, ‘Rab tum par zāhir nahīn huā.’”

Jawāb meñ Rab ne Mūsā se kahā, “Tū ne hāth meñ kyā pakaṛā huā hai?”

Mūsā ne kahā, “Lāṭhī.”

Rab ne kahā, “Use zamīn par ḍāl de.”

Mūsā ne aisā kiyā to lāṭhī sāñp ban gayī, aur Mūsā ḍarkar bhāgā.



Rab ne kahā, “Ab sāñp kī dum ko pakaṛ le.”

Mūsā ne aisā kiyā to sāñp phir lāṭhī ban gayā.

Rab ne kahā, “Yih dekhkar logoñ ko

yaqīn āegā ki Rab jo un ke bāpdādā kā Ḳhudā, Ibrāhīm kā Ḳhudā, Is’hāq kā Ḳhudā aur Yāqūb kā Ḳhudā hai tujh par zāhir huā hai. Ab apnā hāth apne libās meñ ḍāl de.”

Mūsā ne aisā kiyā. Jab us ne apnā hāth nikālā to wuh barf kī mānind safed ho gayā thā. Korḥ jaisī bīmārī lag gaī thī.

Tab Rab ne kahā, “Ab apnā hāth dubārā apne libās meñ ḍāl.”

Mūsā ne aisā kiyā. Jab us ne apnā hāth dubārā nikālā to wuh phir sehatmand thā.

Rab ne kahā, “Agar logoñ ko pahlā mojizā dekhkar yaqīn na āe aur wuh terī na suneñ to shāyad unheñ dūsrā mojizā dekhkar yaqīn āe. Agar unheñ phir bhī yaqīn na āe aur wuh terī na suneñ to Dariyā-e-Nīl se kuchh pānī nikālkar use ḡhushk zamīn par unḍel de. Yih pānī zamīn par girte hī ḡhūn ban jāegā.”

Lekin Mūsā ne kahā, “Mere āqā, maiñ māzarat chāhtā hūñ, maiñ achchhī tarah bāt nahīn kar saktā balki maiñ kabhī bhī yih liyāqat nahīn rakhtā thā. Is waqt bhī jab maiñ tujhse bāt kar rahā hūñ merī yihī hālat hai. Maiñ ruk rukkar boltā hūñ.”

Rab ne kahā, “Kis ne insān kā muñh banāyā? Kyā maiñ jo Rab hūñ yih nahīn kartā? Ab jā! Tere bolte waqt maiñ ḡhud tere sāth hūngā aur tujhe wuh kuchh sikhāūngā jo tujhe kahnā hai.”

Lekin Mūsā ne iltijā kī, “Mere āqā, mehrbānī karke kisī aur ko bhej de.”

Tab Rab Mūsā se saḡht ḡhafā huā. Us ne kahā, “Kyā terā Lāwī bhāī Hārūn aise kām ke lie hāzir nahīn hai? Main jāntā hūn ki wuh achchhī tarah bol saktā hai. Dekh, wuh tujhse milne ke lie nikal chukā hai. Tujhe dekhkar wuh nihāyat ḡhush hogā. Use wuh kuchh batā jo use kahnā hai. Tumhāre bolte waqt main tere aur us ke sāth hūngā aur tumheñ wuh kuchh sikhāūngā jo tumheñ karnā hogā. Hārūn terī jagah qaum se bāt karegā jabki tū merī tarah use wuh kuchh batāegā jo use kahnā hai. Lekin yih lāṡhī bhī sāth le jānā, kyonki isī ke zariye tū yih mojize karegā.”



Rab ne Hārūn se bhī bāt kī, “Registān meñ Mūsā se milne jā.”

Hārūn chal paṛā aur Allāh ke pahār ke pās Mūsā se milā. Us ne use bosā diyā. Mūsā ne Hārūn ko sab kuchh sunā diyā jo Rab ne use kahne ke lie bhejā thā. Us ne use un mojizoṅ ke bāre meṅ bhī batāyā jo use dikhāne the.

Phir donoṅ milkar Misr gae. Wahān pahuṅchkar unhoṅ ne Isrāīl ke tamām buzurgoṅ ko jamā kiyā. Hārūn ne unheṅ wuh tamām bāteṅ sunāīṅ jo Rab ne Mūsā ko batāī thīṅ. Us ne mazkūrā mojize bhī logoṅ ke sāmne dikhāe. Phir unheṅ yaqīn āyā. Aur jab unhoṅ ne sunā ki Rab ko tumhārā k̄hyāl hai aur wuh tumhārī musībat se āgāh hai to unhoṅ ne Rab ko sijdā kiyā.

## Sawāl

- *Ḳhudā ne jaltī huī jhārī ke zariye kyā kiyā?*
  - ▶ Wuh Hazrat Mūsā se hamkalām huā.
- *Hazrat Mūsā ne kyā jawāb diyā?*
  - ▶ Unhoñ ne dhyān dekar us kī sunī. Lekin un ke dil meñ shak bhī ubhar āyā ki main achchhī tarah bāt nahīn kar saktā aur log merī nahīn māneñge.
- *Ḳhudā kyā farmātā hai jab Hazrat Mūsā apne āp par shak karte haiñ?*
  - ▶ Wuh na sirf un kī hauslā-afzāī kartā hai balki wuh unheñ ek achchhā hal bhī pesh kartā hai.
- *Hal kyā thā?*
  - ▶ Yih ki Hārūn un kī madad kar saktā hai.
- *Ḳhudā yih hal kyon pesh kartā hai?*
  - ▶ Is lie ki wuh Hazrat Mūsā ke wasīle se Isrāīlī qaum se hamkalām hokar us meñ īmān paidā karnā chāhtā hai.

- *Kyā K̄hudā ham se bhī hamkalām honā chāhtā hai?*
  - ▶ Hān, wuh Kitāb-e-muqaddas ke zariye ham se bāt karnā chāhtā hai.
- *Kyā ham us kī sunte haiñ?*
  - ▶ Zabūr meñ likhā hai,

Rab kā kalām sachchā hai, aur wuh har kām wafādārī se kartā hai.  
(Zabūr 33:4)

Aur Hazrat Īsā al-Masīh farmāte haiñ,

Haqīqat meñ wuh mubārak haiñ jo Allāh kā kalām sunkar us par amal karte haiñ. (Lūqā 28:11)



- *Hazrat Mūsā Ḳhudā kī sunkar us par bharosā rakhte haiñ. Natīje meñ kyā hotā hai?*
  - ▶ Natīje meñ unheñ Ḳhudā kī qudrat mālūm hotī hai. Wuh dekhte haiñ ki Firaun ko lāzimī Isrāīliyoñ ko chhoṛnā hai. Aur unheñ samajh ātī hai ki Allāh Ta’ālā apnā wādā pūrā karegā: Wuh apnī qaum ko Mulk-e-Falastīn meñ lāegā, chāhe dushman kyā kuchh kyon na kare.
- *Jab ham Ḳhudā kī sunkar us par bharosā karen to ham kyā dekheñge?*
  - ▶ Ham apnī zindagī meñ bhī is kā tajribā kareñge. Kyonki wuh qādir hai, aur jo wāde us ne kie haiñ, unheñ wuh lāzimī pūrā kartā hai.

Āp ne pūre dil-o-jān se jān liyā hai ki jo bhī wādā Rab āp ke Ḳhudā ne āp ke sāth kiyā wuh pūrā huā hai. Ek bhī adhūrā nahīñ rah gayā.

(Yashua 23:14)

Jo us par bharosā rakhe use wuh nahīñ chhoṛtā.



Main phir kahtā hūn ki mazbūt aur diler ho. Na ghabrā aur na hauslā hār, kyonki jahān bhī tū jāegā wahān Rab terā Ḳhudā tere sāth rahegā.” (Yashua 1:9)

Yasāyāh Nabī jānte haiñ ki wuh Allāh par bharosā rakh saktā hai, kyonki Allāh ne wādā kiyā hai ki

Main Rab terā Ḳhudā hūn. Main tere dahne hāth ko pakaṛkar tujhe batātā hūn, ‘Mat ḍarnā, main hī terī madad kartā hūn.’ (Yasāyāh 41:13)

Aur Hazrat Īsā wādā karte haiñ ki

Dekho, main duniyā ke iḳhtitām tak hameshā tumhāre sāth hūn.  
(Mattī 28:20)




### **Mūsā aur Hārūn Firaun ke Darbār Meñ**

Phir Mūsā aur Hārūn Firaun ke pās gae. Unhoñ ne kahā, “Rab Isrāīl kā Ḳhudā farmātā hai, ‘Merī qaum ko registān meñ jāne de tāki wuh mere lie īd manāen’.” Firaun ne jawāb diyā, “Yih Rab kaun hai? Main kyon us kā hukm mānkar Isrāīliyon ko jāne dūn? Na main Rab ko jāntā hūn, na Isrāīliyon ko jāne dūngā.”

### **Jawāb meñ Firaun kā Saḡht Dabāw**

Usī din Firaun ne Misrī nigrānoñ aur un ke taht ke Isrāīlī nigrānoñ ko hukm diyā, “Un se aur zyādā saḡht kām karāo, unheñ kām meñ lagāe rakho. Un ke pās itnā waqt hī na ho ki wuh jhūṭhī bātoñ par dhyān deñ.”



### **Pānī Ḳhūn meñ Badal Jātā Hai**


Phir Rab ne Mūsā se kahā, “Firaun merī qaum ko Misr chhoṛne se roktā hai. Kal subh-sawere jab wuh Dariyā-e-Nīl par āegā to us se milne ke lie dariyā ke kināre par khare ho jānā. Us lāṭhī ko thāme rakhnā jo sānp ban gaī thī. Jab wuh wahān pahuñche to us se kahnā, ‘Ḳhudā ne mujhe āp ko yih batāne ke lie bhejā hai ki merī qaum ko merī ibādat karne ke lie registān meñ jāne de. Lekin āp ne abhī tak us kī nahīn sunī. Chunāñche ab āp jān leñge ki wuh Rab hai. Maiñ is lāṭhī ko jo mere hāth meñ hai lekar Dariyā-e-Nīl ke pānī ko mārūngā. Phir wuh ḳhūn meñ badal jāegā. Dariyā-e-Nīl kī machhliyāñ mar jāengī, dariyā se badbū uṭhegī aur Misrī dariyā kā pānī nahīn pī sakeñge.”

Chunānche Mūsā aur Hārūn ne Firaun aur us ke ohdedāron ke sāmne apnī lāṭhī uṭhākar Dariyā-e-Nīl ke pānī par mārī. Is par dariyā kā sārā pānī ḳhūn meñ badal gayā.

## **Menḍhak**


Pānī ke badal jāne ke bād sāt din guzar gae. Phir Rab ne Mūsā se kahā, “Firaun ke pās jākar use batā denā ki Rab farmātā hai, ‘Merī qaum ko merī ibādat karne ke lie jāne de, warnā main pūre Misr ko menḍhakoñ se sazā dūngā. Dariyā-e-Nīl menḍhakoñ se itnā bhar jāegā ki wuh dariyā se nikalkar tere mahl, tere sone ke kamre aur tere bistar meñ jā ghuseñge. Wuh tere ohdedāron aur terī riāyā ke gharoñ meñ āeñge balki tere tanūron aur āṭā gūndhne ke bartanoñ meñ bhī phudakte phireñge. Menḍhak tujh par, terī qaum par aur tere ohdedāron par chaḥ jāeñge’”

Rab ne Mūsā se kahā, “Hārūn ko batā denā ki wuh apnī lāṭhī ko hāth meñ lekar use dariyāoñ, nahron aur johaḥoñ ke ūpar uṭhāe tāki menḍhak bāhar nikalkar Misr ke mulk meñ phail jāeñ.” Hārūn ne Mulk-e-Misr ke pānī ke ūpar apnī lāṭhī uṭhāi to menḍhakoñ ke ḡhol pānī se nikalkar pūre mulk par chhā gae.



Firaun ne Mūsā aur Hārūn ko bulākar kahā, “Rab se duā karo ki wuh mujh se aur merī qaum se menḍhakoñ ko dūr kare. Phir main tumhārī qaum ko jāne dūngā tāki wuh Rab ko qurbāniyāñ pesh karen.”

Mūsā aur Hārūn Firaun ke pās se chale gae, aur Mūsā ne Rab se minnat kī ki wuh menḍhakoñ ke wuh ḡhol dūr kare jo us ne Firaun ke ḡhilāf bheje the. Rab ne us kī duā sunī. Gharoñ, sahoñ aur khetoñ meñ menḍhak mar gae. Lekin jab Firaun ne dekhā ki maslā hal ho gayā hai to wuh phir akar gayā aur un kī na sunī.



## **Jueñ**

Phir Rab ne Mūsā se kahā, “Hārūn se kahnā ki wuh apnī lāṭhī se zamīn kī gard ko māre. Jab wuh aisā karegā to pūre Misr kī gard juoñ meñ badal jāegī.”

Hārūn ne apnī lāṭhī se zamīn kī gard ko mārā to pūre mulk kī gard juoñ meñ badal gaī. Un ke ḡhol jānwaroñ aur ādmiyoñ par chhā gae.

Jādūgaroñ ne Firaun se kahā, “Allāh kī qudrat ne yih kiyā hai.” Lekin Firaun ne un kī na sunī.

## **Kāṭne Wālī Makkhiyāñ**

Phir Rab ne Mūsā se kahā, “Jab Firaun subh-sawere dariyā par jāe to tū us ke rāste meñ kharā ho jānā. Use kahnā ki Rab farmātā hai, ‘Merī qaum ko jāne de tāki wuh merī ibādat kar sakeñ. Warnā




main tere aur tere ohdedāron ke pās, terī qaum ke pās aur tere gharon meñ kātne wālī makkhiyān bhej dūngā. Misriyon ke ghar makkhiyon se bhar jāenge balki jis zamīn par wuh khare hain wuh bhī makkhiyon se ḍhānkī jāegī. Lekin us waqt main apnī qaum ke sāth jo Jushn meñ rahtī hai farq sulūk karūngā. Wahān ek bhī kātne wālī makkhī nahīn hogī. Is tarah tujhe patā lagegā ki is mulk meñ main hī Rab hūn. Main apnī qaum aur terī qaum meñ imtiyāz karūngā. Kal hī merī qudrat kā izhār hogā.” Rab ne aisā hī kiyā.

Firaun ne jawāb diyā, “Ṭhīk hai, main tumheñ jāne dūngā tāki tum registān meñ Rab apne Ḳhudā ko qurbāniyān pesh karo. Lekin tumheñ zyādā dūr nahīn jānā hai. Aur mere lie bhī duā karnā.”

Mūsā ne kahā, “Ṭhīk, main jāte hī Rab se duā karūngā. Kal hī makkhiyān Firaun, us ke ohdedāron aur us kī qaum se dūr ho jāēngī. Lekin hamēn dubārā fareb na denā balki hamēn jāne denā tāki ham Rab ko qurbāniyān pesh kar sakeñ.”

Rab ne Mūsā kī duā sunī. Kāṭne wālī makkhiyān Firaun, us ke ohdedāron aur us kī qaum se dūr ho gaīn. Ek bhī makkhī na rahī. Lekin phir Firaun ne Isrāīliyon ko jāne na diyā.



### **Maweshiyon meñ Wabā**

Phir Rab ne Mūsā se kahā, “Firaun ke pās jākar use batā ki Rab Ibrāniyon kā Ḳhudā farmātā hai, ‘Merī qaum ko jāne de tāki wuh merī ibādat kar sakeñ.’ Agar āp inkār kareñ aur unheñ rokne




raheñ to Rab apnī qudrat kā izhār karke āp ke maweshiyon meñ bhayānak wabā phailā degā jo āp ke ghoṛon, gadhon, ūṇon, gāy-bailon, bheṛ-bakriyon aur menḍhon meñ phail jāegī. Lekin Rab Isrāil aur Misr ke maweshiyon meñ imtiyāz karegā. Isrāiliyon kā ek bhī jānwar nahīn maregā. Rab ne faislā kar liyā hai ki wuh kal hī aisā karegā.”

Agle din Rab ne aisā hī kiyā. Misr ke tamām maweshī mar gae, lekin Isrāiliyon kā ek bhī jānwar na marā. Firaun ne kuchh logon ko un ke pās bhej diyā to patā chalā ki ek bhī jānwar nahīn marā. Tāham Firaun ne Isrāiliyon ko jāne na diyā.

### **Phoṛe-Phuñsiyān**

Phir Rab ne Mūsā aur Hārūn se kahā, “Apnī muṭṭhiyān kisī bhaṭṭī kī rākh se bharkar Firaun ke pās jāo. Phir Mūsā Firaun ke sāmne yih rākh hawā meñ uṛā de. Yih rākh bārīk dhūl kā bādāl ban jāegī jo pūre mulk par chhā jāegā. Us ke asar se logon aur jānwaron ke jismon par phoṛe-phuñsiyān phuṭ nikleṅge.”

Mūsā aur Hārūn ne aisā hī kiyā. Wuh kisī bhaṭṭī se rākh lekar Firaun ke sāmne khaṛe ho gae. Mūsā ne rākh ko hawā meñ uṛā diyā to insānon aur jānwaron ke jismon par phoṛe-phuñsiyān nikal āe. Is martabā jādūgar Mūsā ke sāmne khaṛe bhī na




ho sake kyonki un ke jismoñ par bhī phoṛe nikal āe the. Tamām Misriyoñ kā yihī hāl thā. Lekin Firaun ne Mūsā aur Hārūn kī na sunī.

### **Ole**

Is ke bād Rab ne Mūsā se kahā, “Subh-sawere uṭh aur Firaun ke sāmne khare hokar use batā ki Rab Ibrāniyoñ kā Ḳhudā farmātā hai, ‘Merī qaum ko jāne de tāki wuh merī ibādat kar sakeñ. Warnā maiñ apnī tamām āfateñ tujh par, tere ohdedāroñ par aur terī qaum par āne dūngā. Phir tū jān legā ki tamām duniyā meñ mujh jaisā koī nahiñ hai.”

Rab ne Mūsā se kahā, “Apnā hāth āsmān kī taraf barhā de. Phir Misr ke tamām insānoñ, jānwaroñ aur khetoñ ke paudhoñ par ole paṛenge.” Mūsā



ne apnī lāṭhī āsmān kī taraf uṭhāī to Rab ne ek zabardast tūfān bhej diyā. Ole paṛe, bijlī girī aur bādāl garajte rahe. Wuh sirf Jushn ke ilāqe meñ na paṛe jahān Isrāīlī ābād the. Tab Firaun ne Mūsā aur Hārūn ko bulāyā. Us ne kahā, “Is martabā main ne gunāh kiyā hai. Rab haq par hai. Mujh se aur merī qaum se ḡhalatī huī hai. Ole aur Allāh kī garajtī āwāzeñ had se zyādā haiñ. Rab se duā karo tāki ole ruk jāeñ. Ab main tumheñ jāne dūngā. Ab se tumheñ yahān rahnā nahīn paṛegā.”

Jab Firaun ne dekhā ki tūfān khatm ho gayā hai to wuh aur us ke ohdedār dubārā gunāh karke akar gae. Firaun ne Isrāīliyoñ ko jāne na diyā.

## **Ṭiḍḍiyān**

Phir Rab ne Mūsā se kahā, “Firaun ke pās jā, kyonki main ne us kā aur us ke darbāriyon kā dil saḡht kar diyā hai.”

Mūsā aur Hārūn Firaun ke pās gae. Unhoñ ne us se kahā, “Rab Ibrāniyon ke Ḳhudā kā farmān hai, ‘Tū kab tak mere sāmne hathiyār ḍālne se inkār karegā? Merī qaum ko merī ibādat karne ke lie jāne de, warnā main kal tere mulk meñ ṭiḍḍiyān lāūngā. Un ke ḡhol zamīn par yon chhā jāenge ki zamīn nazar hī nahīn āegī. Jo kuchh oloñ ne tabāh nahīn kiyā use wuh chaṭ kar jāengī. Bache hue daraḡhton ke patte bhī ḡhatm ho jāenge. Tere mahl, tere ohdedāron aur bāqī logoñ ke ghar un se bhar jāenge.

Firaun ne kahā, “Main kis tarah tum sab ko bāl-bachchoñ samet jāne de saktā hūñ?” Tab Mūsā aur Hārūn ko Firaun ke sāmne se nikāl diyā gayā.

Phir Rab ne Mūsā se kahā, “Misr par apnā hāth uṭhā tāki ṭiḍḍiyān ākar Misr kī sarzamīn par phail jāen.”

Tab Firaun ne Mūsā aur Hārūn ko jaldī se bulwāyā. Us ne kahā, “Main ne tumhāre Ḳhudā kā aur tumhārā gunāh kiyā hai. Ab ek aur martabā




merā gunāh māf karo aur Rab apne Ḳhudā se duā karo tāki maut kī yih hālat mujh se dūr ho jāe.”

Mūsā ne mahl se nikalkar Rab se duā kī. Jawāb meñ Rab ne hawā kā ruḳh badal diyā. Us ne maḡhrib se tez āndhī chalāī jis ne ṭiḍḍiyon ko uṛākar Bahr-e-Qulzum meñ ḍāl diyā. Misr meñ ek bhī ṭiḍḍī na rahī. Lekin phir Firaun ne Isrāīliyon ko jāne na diyā.

### **Andherā**

Is ke bād Rab ne Mūsā se kahā, “Apnā hāth āsmān kī taraf uṭhā to Misr par andherā chhā jāegā. Itnā andherā hogā ki bandā use chhū sakegā.”

Mūsā ne apnā hāth āsmān kī taraf uṭhāyā to tīn dīn tak Misr par gahrā andherā chhāyā rahā. Tīn dīn tak log na ek dūsre ko dekh sake, na kahīn jā



sake. Lekin jahān Isrāīlī rahte the wahān raushnī thī.




Lekin Firaun ne unheñ jāne na diyā. Us ne Mūsā se kahā, “Dafā ho jā. Ḳhabrdār! Phir kabhī apnī

shakl na dikhānā, warnā tujhe maut ke hawāle kar diyā jāegā.

Mūsā ne kahā, “Ṭhīk hai, āp kī marzī. Main phir kabhī āp ke sāmne nahīn āūngā.”

### **Ākhirī Sazā kā Elān**

Tab Rab ne Mūsā se kahā, “Ab main Firaun aur Misr par ākhirī āfat lāne ko hūñ. Is ke bād wuh tumheñ jāne degā balki tumheñ zabardastī nikāl degā. Isrāīliyoñ ko batā denā ki har mard apne paṛosī aur har aurat apnī paṛosan se sone-chāndī kī chīzeñ māng le.” (Rab ne Misriyoñ ke dil Isrāīliyoñ kī taraf māyl kar die the. Wuh Firaun ke ohdedāroñ samet kḥāskar Mūsā kī baṛī izzat karte the).



Mūsā ne kahā, “Rab farmātā hai, ‘Āj ādhī rāt ke waqt main Misr mein se guzarūngā. Tab bādshāh ke pahlaūthe se lekar chakkī pīsne wālī naukarānī ke pahlaūthe tak Misriyon kā har pahlaūthā mar jāegā. Chaupāiyon ke pahlaūthe bhī mar jāenge. Misr kī sarzamīn par aisā ronā-pīṭnā hogā ki na māzī mein kabhī huā, na mustaqbil mein kabhī hogā. Lekin Isrāīlī aur un ke jānwar bache raheṅge. Kuttā bhī un par nahīn bhaunkegā. Is tarah tum jān loge ki Rab Isrāīliyon kī nisbat Misriyon se farq sulūk kartā hai.”



## Sawāl

- *Firaun kā gunāh kyā thā?*
  - ▶ Firaun ne is meñ gunāh kiyā ki us ne Isrāīlī qaum ko jāne na diyā.
- *Ḳhudā ne jawāb meñ kyā kiyā?*
  - ▶ Us ne Firaun ko ḳhabrdār kiyā. Us ne us par āfateñ bhī nāzil kīñ. Yoñ us ne use taubā karne ke bahut mauqe die hālāñki is kā natījā sifār thā: Firaun saḳhtdil rahā aur na mānī.
- *Jab Firaun ne Ḳhudā kī na sunī to Ḳhudā ne āḳhir meñ kyā kiyā?*
  - ▶ Ḳhudā ko Firaun aur Misrī qaum ko daswīñ āfat se sazā denā parā. Tab har ghar kā pahlauṭhā mar gayā. Sirf wuh ghar bach gae jin ke darwāzoñ ke chaukhaṭoñ par ḳhūn lagāyā gayā thā.
- *Firaun ke gunāh kā kyā natījā hai?*
  - ▶ Yih zāhir kartā hai ki gunāh hameñ Ḳhudā se dūr kartā hai. Is kā sirf ek munāsib sazā hai yānī maut.

Allāh halīm aur rahmdil hai, aur wuh hamen bhī Rozānā bardāsht kartā hai, go ham se ghalatiyān hotī rahtī haiñ. To bhī us ke sabr kī ek had hotī hai. Tab hamārī kyā hālat hogī? Kyā ham bacheñge yā sazā ke taht tabāh ho jāeñge? Is lie Injil Sharīf men likhā hai,

Agar tum āj Allāh kī āwāz suno to apne dilon ko saḡht na karo.  
(Ibrāniyon 3:8)

Āie ham Allāh kī āwāz sunen. Allāh nahīn chāhtā ki ham gunāh ke bāis halāk ho jāen. Lekin hamāre gunāh hamen us se dūr aur alag rakhte haiñ. To bhī Zabūr yaqīn se kah saktā hai,

Lekin Allāh merī jān kā fidyā degā, wuh mujhe pakaḡkar pātāl kī girift se chhuḡāegā. (Zabūr 49:15)

To ham kis tarah halākat se bachkar Allāh kī huzūrī men ā sakte haiñ? Āie ham āge paḡhte haiñ.



## **Fasah kī Īd**

Phir Rab ne Misr meñ Mūsā aur Hārūn se kahā, “Ab se yih mahīnā tumhāre lie sāl kā pahlā mahīnā ho. Isrāīl kī pūrī jamāt ko batānā ki is mahīne ke dasweñ din har k̄hāndān kā sarparast apne gharāne ke lie lelā yānī bheṛ yā bakrī kā bachchā hāsīl kare. Agar gharāne ke afrād pūrā jānwar khāne ke lie kam hoñ to wuh apne sab se qarībī paṛosī ke sāth milkar lelā hāsīl karen. Itne log us meñ se khāeñ ki sab ke lie kāfī ho aur pūrā jānwar khāyā jāe. Is ke lie ek sāl kā nar bachchā chun lenā jis meñ nuqs na ho. Wuh bheṛ yā bakrī kā bachchā ho saktā hai.

Mahīne ke 14weñ din tak us kī dekh-bhāl karo. Us din tamām Isrāīlī sūraj ke ghurūb hote waqt

apne lele zabah karen. Har khandan apne janwar ka kuchh khun jamā karke use us ghar ke darwāze ki chaukhat par lagāe jahn lelā khāyā jāegā. Yih khun chaukhat ke upar wāle hisse aur daen-baen ke bazuon par lagāyā jāe. Lāzim hai ki log janwar ko bhunkar usi rat khāen. Sāth hi wuh karwā sāg-pāt aur bekhāmīrī rotiyān bhī khāen.

Lele ka gosht kachchā na khānā, na use pānī meñ ubālnā balki pūre janwar ko sar, pairon aur andarūnī hisson samet āg par bhūnanā. Lāzim hai ki purā gosht usi rat khāyā jāe. Agar kuchh subh tak bach jāe to use jalānā hai. Khānā khāte waqt aisā libās pahnanā jaise tum safr par jā rahe ho. Apne jūte pahne rakhnā aur hāth meñ safr ke lie lāthī lie hue tum use jaldī jaldī khānā. Rab ke Fasah ki Īd yon manānā.



Maiñ āj rat Misr meñ se guzarūngā aur har pahlauṭhe ko jān se mār dūngā, khāh insān kā ho yā haiwān kā. Yon maiñ jo Rab hūn

Misr ke tamām dewtāon ki adālat karūngā. Lekin tumhāre gharon par lagā huā khun tumhārā khās

nishān hogā. Jis jis ghar ke darwāze par main wuh  
ḡhūn dekhūngā use chhoṛtā jāūngā. Jab main  
Misr par hamlā karūngā to mohlak wabā tum tak  
nahīn pahūnchegī.

Āj kī rāt ko hameshā yād rakhnā. Ise nasl dar  
nasl aur har sāl Rab kī ḡhās īd ke taur par manānā.”

Phir Mūsā ne tamām Isrāīlī buzurgoṅ ko bulākar  
un se kahā, “Jāo, apne ḡhāndānoṅ ke lie bheṛ yā  
bakrī ke bachche chunkar unheṅ Fasah kī Īd ke lie  
zabah karo. Zūfe kā guchchhā lekar use ḡhūn se  
bhare hue bāsan meṅ ḡubo denā. Phir use lekar  
ḡhūn ko chaukhaṭ ke ūpar wāle hisse aur dāeṅ-  
bāeṅ ke bāzuoṅ par lagā denā. Subh tak koī apne  
ghar se na nikle. Jab Rab Misriyoṅ ko mār ḡālne  
ke lie mulk meṅ se guzaregā to wuh chaukhaṭ  
ke ūpar wāle hisse aur dāeṅ-bāeṅ ke bāzuoṅ par  
lagā huā ḡhūn dekhkar un gharoṅ ko chhoṛ degā.  
Wuh halāk karne wāle farishte ko ijāzat nahīn degā  
ki wuh tumhāre gharoṅ meṅ jākar tumheṅ halāk  
kare.”

Yih sunkar Isrāīliyoṅ ne Allāh ko sijdā kiyā. Phir  
unhoṅ ne sab kuchh waisā hī kiyā jaisā Rab ne  
Mūsā aur Hārūn ko batāyā thā.



### **Pahlauṭhoṅ kī Halākat**

Ādhī rāt ko Rab ne bādshāh ke pahlauṭhe se lekar jail ke qaidī ke pahlauṭhe tak Misriyoṅ ke tamām pahlauṭhoṅ ko jān se mār diyā. Chaupāiyōṅ ke pahlauṭhe bhī mar gae. Us rāt Misr ke har ghar meṅ koī na koī mar gayā. Firaun, us ke ohdedār aur Misr ke tamām log jāg uṭhe aur zor zor se rone aur chīkhne lage.

### **Isrāīliyoṅ kī Hijrat**

Abhī rāt thī ki Firaun ne Mūsā aur Hārūn ko bulākar kahā, “Ab tum aur bāqī Isrāīlī merī qaum meṅ se nikal jāo. Apnī darḳhāst ke mutābiq Rab kī ibādat karo. Jis tarah tum chāhte ho apnī bheṛ-



bakriyon ko bhī apne sāth le jāo. Aur mujhe bhī barkat denā.”

Bāqī Misriyon ne bhī Isrāīliyon par zor dekar kahā, “Jaldī jaldī mulk se nikal jāo, warnā ham sab mar jāenge.”

Isrāīliyon ke gūndhe hue āṭe meñ khamīr nahīn thā. Unhoñ ne use gūndhne ke bartanoñ meñ rakhkar apne



kapron meñ lapeṭ liyā aur safr karte waqt apne kandhoñ par rakh liyā. Isrāīlī Mūsā kī hidāyat par amal karke apne Misrī paṛosiyon ke pās gae aur un

se kapre aur sone-chāndī kī chīzen māngīn. Rab ne Misriyon ke dilon ko Isrāīliyon kī taraf māyl kar diyā thā, is lie unhoñ ne un kī har darḳhāst pūrī kī. Yoñ Isrāīliyon ne Misriyon ko lūṭ liyā. Tab Isrāīlī Misr se nikle.

Us ḳhās rāt Rab ne ḳhud pahrā diyā tāki Isrāīlī Misr se nikal sakeñ. Is lie tamām Isrāīliyon ke lie lāzim hai ki wuh nasl dar nasl is rāt Rab kī tāzīm meñ jāgte raheñ, wuh bhī aur un ke bād kī aulād bhī. Usī din Rab tamām Isrāīliyon ko ḳhāndānon kī tartīb ke mutābiq Misr se nikāl lāyā.





## Sawāl

- *Fasah kī Īd kā kyā maqsad hai?*

- ▶ Is meñ Isrāīlī Allāh kā shukr karte haiñ ki us ne unheñ maut se bachāyā. Jahāñ jahāñ zabah kie gae bheṛ ke bachche kā ḳhūn darwāzoñ ke chaukhaṭoñ ke sāth lagā thā wahāñ us ne unheñ maut se bachākar zindagī baḳhshī.

Sadiyoñ ke bād Yasāyāh Nabī ek anokhī peshgoī pesh karte haiñ. Wuh ek ādmī bayān karte haiñ jo apnī jān ko qurbānī ke taur par degā. Wuh bheṛ ke bachche kī tarah zabah kiyā jāegā:

Use hamāre hī jarāym ke sabab se chhedā gayā, hamāre hī gunāhoñ kī ḳhātir kuchalā gayā. Use sazā milī tāki hameñ salāmatī hāsil ho, aur usī ke zaḳhmoñ se hameñ shafā milī. (Yasāyāh 53:5)

Aur jab Hazrat Īsā paidā hokar ek din Yūhannā baptismā dene wāle ke pās āe to Yūhannā ne farmāyā,

Dekho, yih Allāh kā lelā hai jo duniyā kā gunāh uṭhā le jātā hai.  
(Yūhannā 1:29)

● *Kyon?*

- ▶ Is lie ki bād meñ Hazrat Īsā ne tamām insānoñ ke gunāhoñ kā fidyā diyā. Maut kī jo sazā har insān ko milnī thī use unhoñ ne apne ūpar uṭhākar bardāsht kiyā tāki hamāre gunāh miṭ jāeñ, unheñ māf kiyā jāe. Jo Hazrat Īsā Masīh ke is kām par pūrā bharosā kare use abadī najāt miltī hai. Likhā hai,

Us [yānī Allāh] ne Masīh ke ḳhūn se hamārā fidyā dekar hameñ āzād aur hamāre gunāhoñ ko māf kar diyā hai. Allāh kā yih fazal kitnā wasī hai jo us ne kasrat se hameñ atā kiyā hai.  
(Ifsiyoñ 1:7-8)

Aur Hazrat Īsā khud apne bāre meñ farmāte hain,

Main tum ko sach batātā hūñ ki jo bhī gunāh kartā hai wuh gunāh kā ghulām hai. Ghulām to ārizī taur par ghar meñ rahtā hai, lekin mālik kā beṭā hameshā tak. Is lie agar farzand tum ko āzād kare to tum haqīqatan āzād hoge.  
(Yūhannā 8:34-36)

Jo bhī is farzand yāñī Hazrat Īsā Masīh par bharosā rakhe use maut kī sazā se bachkar abadī najāt milegī.

Jo mazīd tafsīl se Hazrat Mūsā ke bāre meñ paṛhnā chāhe wuh Tauret meñ K̄hurūj 1 se lekar 13 tak paṛhe.

